

Regum, & Dominus Dominantium. Id. 19. vers. 16.

*I. C. Mediator.*

CLXXXV. Unus Deus, unus Mediator Dei, & hominum; homo Christus Iesus. 1. Thimoth. 2. vers. 5. Christus Iesus qui mortuus est, immo qui & resurrexit, qui est ad dexteram Dei, qui etiam interpellat pro nobis, ad Rom. 8. vers. 34. salvare in perpetuum potest accedentes per semetipsum ad Deum. Semper vivens ad interpellandum pro nobis. ad Heb. 7. vers. 25. Si quis peccaverit advocatum habemus apud Patrem, Iesum Christum justum: & ipse est propitiatio pro peccatis nostris, non pro nostris autem tantum, sed etiam pro totius mundi. 1. Ioan. Epist. cap. 2. vers. 1. 2.

*I. C. Redemptor noster.*

CLXXXVI. Omnes peccaverunt, & egent gloria Dei. Iustificati gratis per gratiam ipsius, per redemptionem, quæ est in Christo Iesu. &c. Rom. 3. vers. 24. & seq. qui dedit redemptionem semetipsum pro omnibus. 1 ad Timoth. 2. vers. 6.

*I. C. Salvator noster.*

CLXXXVII. Tito dilecto filio secundum communem fidem; gratia & pax à Deo Patre, & Christo Iesu Salvatore nostro, Paul. ad Titum. 1. vers. 4. Speramus in Deum vivum, qui est Salvator omnium hominum, maxime fidelium. 1. ad Timoth. c. 4. vers. 10. Sic aliquoties in Psalmis, in Sapient. in Eccl. sapientissime in Isaia, & nomen Iesus idem est atque Salvator. Unde Angelus dixit Iosepho: Pariet (Maria) filium & vocabis nomen eius Iesum; ipse enim salvum faciet populum suum à peccatis eorum. Matth. 1. vers. 21. & non est in alio aliquo salus, nec enim aliud nomen est sub cælo datum hominibus, in quo oporteat nos salvos fieri. Act. Ap. 4. vers. 12.

*I. C. Messias.*

CLXXXVIII. Andreas Simoni fratri suo dicit, se invenisse Messiam (quod est interpretatum Christus.) Ioann. 1. vers. 41. & mulier Samaritana Christum allocuta, scio (inquit illa) quia Messias venit. (qui dicitur Christus) cum ergo venerit ille, nobis annuntiabit omnia. Dicit ei Iesus: Ego sum (Messias) qui loquor tecum. Ioann. 4. vers. 25. 26.

Messias autem Chaldaicè, Christus Græcè, Unctus Latinè idem est.

*I. C. Filius Dei, & Filius Altissimi.*

CLXXXIX. In hoc apparuit charitas Dei in nobis, quoniam Filium suum unigenitum misit Deus in mundum, ut vivamus per eum. 1. Ioan. 4. vers. 9. & ibid. Et nos vidimus, & testificamur, quoniam Pater misit Filium suum Salvatorem mundi. vers. 14. & quisquis confessus fuerit, quoniam Iesus est Filius Dei, Deus in eo manet, & ipse in Deo. vers. 15. Pariet Filium (Angelus Gabriel Mariæ,) & vocabis nomen eius Iesum. Hic erit magnus, & Filius Altissimi vocabitur, & dabit illi Dominus Deus sedem

David patris ejus, & regnabit in domo Iacob in æternum, & Regni ejus non erit finis. Luc. 1. vers. 31. 32. 33.

*I. C. cum Patre Deus.*

In principio erat Verbum, & Verbum erat apud Deum, & Deus erat Verbum. i. In principio erat Filius, & Filius erat apud Deum, & Deus erat Filius. Ioann. 1. vers. 1. Ego & Pater unum sumus; Iesus de se. Ioann. 10. vers. 30. hinc Psalm. 96. vers. 7. Adorate eum omnes Angeli ejus. Et in Ep. ad Heb. 1. dicit Pater de Filio: Filius meus es tu, ego hodie genui te. Et rursum: Ego ero illi in Patrem, & ipse erit mihi in Filium. Et cum introducit primogenitum in orbem terræ, dicit: & adorent eum omnes Angeli Dei. vers. 5. 6. Dicitque ad Filium: Thronus tuus Deus in sæculum sæculi. vers. 8. & Dixit Dominus Domino meo, sede à dextris meis. Psalm. 109. vers. 1. & ad Hebr. 1. vers. 13.

*I. C. Index omnium.*

Hic Iesus qui assumptus est à vobis (Apostolis & Discipulis) in cælum, sic veniet (in die iudicii.) Act. 1. vers. 1. Omnes enim manifestari oportet ante tribunal Christi, ut referat unusquisque propria corporis, prout gessit sive bonum sive malum. 2 Cor. 5. vers. 10. Qui reddent rationem ei (Christo) qui paratus est judicare vivos & mortuos. 1. Petr. 4. vers. 5. Et procedent qui bona fecerunt in resurrectionem vitæ, qui verò mala egerunt, in resurrectionem iudicii. Ioann. 5. vers. 29. Christus etenim semel oblatus est ad multorum exhaurienda peccata; secundo sine peccato apparebit expectantibus se, in salutem. Heb. 9. vers. 28. Plura de ultimo Iesu Christi adventu, sive de die iudicii, apud Matth. 16. vers. 27. & 24. vers. 27... 31. & 25. vers. 31... 34. Marc. 13. vers. 24... 27. Luc. 17. vers. 24... & 21. vers. 25. 26. 27. Ioann. 5. vers. 25... 29. & multoties alibi.

Vocatur & Filius Hominis, sub quo nomine tota penè ejus vita colligi & describi posset; Agnus Dei, Lux Mundi, Lux Gentium, Verus Pastor, &c. Emanuel, &c.

Sed Iesu Christi Salvatoris nostri Nomina, Virtutes, Sapientiam, Præcepta, &c. quis enarrabit? Ex infinitis signorum & miraculorum generibus, quæ dum inter Iudæos esset, peregit, vix Evangelistæ millesimam partem describere; contenti penè ubique dixisse Iesum ex hominibus Dæmonia ejecisse, cæcos illuminasse, claudos & incurvos direxisse, languidos & ægrotos sanasse, leprosos mundasse, morientibus sanitatem, mortuis vitam reddidisse, & paraliticos &c. Ex infinitis Sacra Scripturæ locis quæ suis aperuit & explicavit, & ex mandatis & præceptis quæ dedit, vix argumenta demonstrare, quæ paucissima collegimus: ea sunt ut plurimum ad illius mansiones, itinera, & peregrinationes demonstrandas; reliqua doctioribus, & Scriptoribus sacris describenda relinquimus. & Iesum Christum humilimè precamur, ut labor noster sibi acceptus, suis omnibus inserviat.